

一念普觀無量劫 無去無來亦無住
如是了知三世事 超諸方便成十力

慈悲地藏懺法卷下

一切諸佛。愍念眾生。為說慈悲地藏懺法。今當皈命。一切諸佛。

南無釋迦牟尼佛

南無無量壽尊佛

南無光明功德佛

南無無憂德佛

南無那羅延佛

南無功德華佛

南無蓮華光遊戲神通佛

南無德念佛

南無善名稱功德佛

南無紅燄帝幢王佛

南無善遊步功德佛

南無寶華遊步佛

南無寶蓮華善住娑羅樹王佛

南無鬪戰勝佛

南無善遊步佛

南無周匝莊嚴功德佛

南無文殊師利菩薩

南無大行普賢菩薩

南無觀世音菩薩

南無棄陰蓋菩薩

南無無盡意菩薩

南無虛空藏菩薩

南無地藏王菩薩

南無懺摩會上佛菩薩（三稱）

慈悲地藏懺法卷下

禮諸佛已。次復懺悔。上來已懺惑業報竟。三障清淨。三道停酸。今當懺悔鬼畜人道。三種餘愆。是諸眾生。皆於過去

無量劫時。非毀律儀。破菩薩戒。污涅槃性。壞菩提根。乘十習因。造無量罪。不孝父母。違逆師長。恣殺盜妄。美己惡人。奸淫邪污。造種種業。報入無間。受苦萬端。歷劫燒然。受諸苦劇。獄報雖盡。還墮鬼倫。仍有十種鬼趣出生。若本淫習。貪色為因。男女相逐。放佚成風。罪在獄中。以經塵劫。出生人間。遇風成魃。殺槁田禾。燒空雨氣。枯涸江河。欲習致焚於神廟。淫心累溺於子亡。如斯一類。名旱魃鬼。貪財為因。盜竊成習。侵公益私。不捨恻心。損人利己。如是等業。報畢出獄。得升人間。依然鬼道。附托金銀玉帛。或依草木成形。金精戲於竇義。樹神擊於曹瞞。如斯一類。名為怪鬼。若其慢習。貪傲為因。發於相恃。高舉陵人。自強傲物。身謝命終。洎報地獄。已經沙劫。情畢想升。依然幽隱。遇氣成形。傲罔不息。常抱饑虛。縱遇水時。還能害己。五百年不聞漿水之名。千萬劫常受饑餒之苦。如斯一類。名曰餓鬼。貪習憶業。由貪交衝。發於相忤。懷憶不忘。造心忿恨。展轉為瞋。瞋火燒空。然成地獄。情報罪畢。想升人間。遇衰為患。猶依忿氣。毒厲傷寒。傳屍骨蒸。乃至生無能以滅賊。死有感而威神。如斯一類。名厲志鬼。若本詐習。性自依奸。憑虛架妄。由調相牽。引起惡業。招地獄愆。沉潛億劫。受苦無窮。情畢想升。暫生人間。遇畜成形。詐言禍福。狐狸豬狗。鸚鵡鵠禽。公冶長於繲綫。裴生脫於羈縻。如斯一類。名為魅鬼。若本誑習。貪妄成愆。多謀陰覆。利養自求。罔冒權英。令人情昧。凡其幹略。

自落穀中。發於相妄。互為是非。因遭地獄。業報情枯。想升人世。遇幽成形。還依臥寐。寢俛其人。黃梁炊於頃刻。槐柯吏於終朝。如斯一類。名魘寐鬼。若其夙習。貪恨為由。懷惡造業。結怨成仇。獄報累己。以經多劫。情畢想升。暫處人間。遇蠱成形。龜蛇怪異。災咎逆知。幽隱纏綿。餘習之報。智感夢於明王。身難脫於鼎鑊。如斯一類。名蠱毒鬼。若本明習。覆心成業。內外正典。異見邪生。雖事經緯。出生常反。撥無因果。違拒戒常。墮在獄中。情畢想升。方為鬼道。遇明成形。日月薄蝕。山澤妖神。黃石符於秘術。青囊妙於玄箴。如斯一類。名魍魎鬼。由因本習。貪成為緣。誑偽之業。枉狎巫禡。舉枉錯直。率己欺人。擾害無辜。證述其罪。而茲造惡。以報無間。情畢想升。出生人間。伶仃役卒。運石搬沙。塞澗填河。鞭山入海。錢王射於水鬼。秦始策於山靈。如斯一類。名役使鬼。由因宿習。貪黨成群。攻發人之隱惡。樹黨己之兇倫。斯其造罪。獄治情枯。想升人世。傳送成形。如世扶箕。巫祝。童戲。卜算吉凶。休咎禍福。指顧陰陽。九流雖示於趨避。然皆墮落於偏邪。如斯一類。名傳送鬼。如是十類鬼人。皆由迷真逐妄。幻作幻成。枉構是非。俱從情想。洎受獄愆。還依鬼趣。業火煎燒。報滋逮盡。餘波未竭。墮十類中。故我今日。恭對三寶。地藏慈尊。一一披陳。重重懺悔。過去十習。一併銷除。未來鬼身。永不復受。脫幽沉之苦趣。隨所願以遨遊。念念修行。心心善道。同得法忍。乃至菩提。永絕情源。長泛覺

海。我與眾等。重復志誠。五體投地。皈命敬禮。一切諸佛。

南無釋迦牟尼佛

南無阿彌陀佛

南無一切智成就佛

南無大光明佛

南無蓮華清淨目佛

南無定光明佛

南無智慧光明佛

南無功德光明佛

南無福德光明佛

南無袈裟幢佛

南無師子吼自在王佛

南無覺華自在王佛

南無師子奮迅具足萬行佛

南無文殊師利菩薩

南無普賢菩薩

南無觀世音菩薩

南無大勢至菩薩

南無無盡意菩薩

南無財首菩薩

南無本尊地藏王菩薩

禮諸佛已。次復懺悔。向來已懺鬼道罪竟。今當懺悔畜道愆尤。所以然者。獄治情枯。鬼懲想竭。則情與想。二妄俱空。方出人間。便為畜道。與元負人。怨對相逢。酬償夙債。亦有十種旁生異類。而怪物之鬼。物銷形滅。來生人間。多為梟類。未亡餘習。貪塊為兒。啣蟲作子。一概異怪。是等畜生。我今為其發露懺悔。往習銷除。乘地藏之慈力。脫苦類於梟禽。究竟本元。得心自在。若風魃之鬼。風銷鬼滅。來生人間。多為咎徵。群雀知儉。眾鼠鳴荒。鷓鴣致水。石燕應風。鶴舞多旱。虹架物消。其類匪一。總曰咎徵。乘今

發露。願出迷倫。得法自在。隨願超登。若其媚鬼。畜死物亡。來生人間。詐習成形。鬼仍諂媚。所依既滅。畜受狐身。貓狸犬屬。乞濟依人。諂媚千求。統名狐畜。懺悔感佛恩。消宿世習因。後不受果。若其蠱類。毒消形亡。來生人間。還名畜類。蚺蛇蝮蝎。潛龍虎豹。螫蠱於人。如是怨習。展轉難忘。乘我等之懺力。脫異類之匪身。漸漸契真。不沉惑妄。又復懺悔。衰癘之鬼。脫生人間。名為蛔類。瞋習所使。鬼為衰癘。入人身中。還受畜生。復托身中。為蛔蟻屬。瞋習剛愎。畜報柔蟲。因果迭逢。翻覆間爾。如是等習。願懺消除。乘佛慈恩。即得心樂。受氣之鬼。氣消物故。來生人間。都為食類。貪慢是因。饑虛其果。身供庖廚。故名食類。肌膚充饋。骨肉給餐。鱗甲毛禽。雞鵝魚鼈。牛羊豬屬。枉罹刀砧。慢習餘波。沉淪畜報。如是等眾。為其懺悔。所有枉業。罪悉冰消。若綿幽之鬼。魂滅幽消。來生人間。都為服類。鬼受幽纏。仍為魘魅。幽默既消。顯為服類。駝驢牛馬。蠶繭貂裘。幽隱不明。故墮異屬。誑習是因。故儔服果。承今懺力。滌昔因緣。仗地藏之鴻恩。獲天倫之極樂。靜心綿密。照性無為。到菩提鄉。出生死海。次復懺悔。和精之鬼。見習夙因。今為畜類。節序猶知。春來紫燕。夏至黃鶯。秋返霜鴻而庠序。冬藏雪雀以徘徊。蛤鵲交形。蜻蜓異質。逐時變化。隨類易生。若夫明靈之鬼。明滅魂消。生於人世多為休徵。因乘枉習。果托明生。以為驅使。鬼道業盡。畜報休徵。祥瑞將至。預有徵明。鳳出周興。麟生

聖產。林鵲報乎人喜。蜘蛛垂乎禧祺。如是一類。盡曰休徵。我今頂禮懺法。為其洗滌宿因。頓復明心。旋歸性地。永依聖教。不墮輪迴。妙契無為。入心地藏。依人之鬼。人亡鬼滅。生在世間。多為馴類。訟習之因。鬼招傳送。今已為畜。報質黠慧。頻伽美韻。鸚鵡巧言。鵠能誦佛。獼猴學人。雖號靈禽。為人所畜。然上十類。皆因妄情冰結。習業劇招。枉逐三塗。無窮火業。情水燒枯。酬償夙債。尚作畜生。因人而畜。故號畜生。形旁行旁。故曰旁生。皆由妄業之所招感。於心地秘藏。總是空華。於空華體上。寧存實果。是故今來。我與眾等。先懺鬼道。次懺畜生。企伊同悟。十習妄因。即生同證。一乘實果。又復應知。如上鬼畜。各償先債。報滿之時。復還人道。就人道中。亦有十種差別。若過去世。曾負其財。或役其力。酬足自停。於先世時。或殺彼命。或食其肉。如是乃至經微塵劫。相食相誅。猶如井輪。互為高下。盡未來時。莫能止遏。除斯懺悔。解脫何期。是故我等。志心禮拜。為其發露。求哀懺謝。宿業既淨。便升人道。夫人道生者。蓋因常戒。為正因緣。今三途盡。亦得為人。而有愚者言。惡業苦盡。自得為人。何須修善植福。方作人天善路。如其想念。罪真不輕。然人道在世。總報雖同。智愚迥異。故有貴賤十種分別。今者三途報盡。故曰得昇。乃是餘業旁受。誠非正因緣生。是故經云。標名參合。眾等當知。彼梟倫者。酬足復形。生人道中。參合頑類。然因貪物。鬼托怪形。畜生土梟。今復人身。其性顛蒙。參

合頑囂。心亡德義。志豈存仁。不孝不忠。無廉無恥。任意
喧囂。貪習之故。彼咎徵者。酬足復形。生人道中。參合蒙
癡。宿習貪淫。鬼受魃精。上為畜生。災咎之應。業盡復人
。猶為愚癡。著淫欲故。不修餘善。故招愚鈍。知善不從。
教誨違戾。背條反律。如醉如癡。故曰愚魯。彼狐倫者。酬
足復形。生人道中。參合凶狠。獄治詐習。鬼托媚倫。類入
旁生。狐狸所攝。今為人趣。凶狠交參。剛愎自用。不受人
諫。自專自用。真賤庸人。彼毒蠱者。報畢復形。生於人道
。參合傭類。怨習是因。蠱毒為果。旁生畜道。蝮蛇是形。
今復人身。裸充侷賤。為人驅使。自歷饑寒。是昔餘殃。今
招卑賤。彼蛔倫者。生人道中。參合微類。貪瞋為習。鬼報
衰癘。蟻蛔成畜。柔弱為人。人不齒錄。不自寒暑。憑他飽
餒。剛愎翻柔。因果迭奏。彼食倫者。酬償自足。亦為復形
。生人道中。參合柔倫。貪慢習因。餓鬼感果。空腹高心。
無實體性。畜報食彝。為人柔弱。蓋因貢高。而招一懦。強
弱歷然。誰肯信者。若彼服倫。酬足復形。出生人道。參合
勞屬。虛妄誑因。鬼為幽魘。畜承服忍。人受勤劬。役力艱
辛。百工技藝。諸務雜儔。寒暑策驅。故曰勞類。彼應倫者
。酬足為人。參合文明。因從見習。鬼落和精。魍魎報終。
畜召應物。參合人道。綽有文聲。非正因緣。故名參合。若
其休徵。亦復為人。參合明倫。枉習因由。明靈果報。驅馳
役使。無暫停休。畜招黠慧。人受聰明。考古尋今。毫無差
舛。彼循倫者。酬足復人。參於達類。由因訟習。鬼報依人

。符祝傳詞。咒彰禍福。畜報夙因。人達窮通。榮辱不驚。猶知進退。如辟穀於深山。或乘桴於滄海。如是一類。故曰達倫。然上十種。皆過去劫。未聞佛法。不假僧修。任十習之妄因。造十種之劇業。幻受泥犁。情竭想升。還為鬼道。鬼道報盡。復還畜生。畜生報終。旋復人身。雖復人身。十種迥異。皆由妄執顛倒。十使為緣。致造十惡。汝負我命。我負汝財。相生相殺。妄作妄為。不遇佛乘。未聞善法。遠離僧修。偏任習因。於塵牢中。法爾流轉。寧免佛言。深可憐愍。故我今者。遵三寶之垂教。依地藏之圓經。發等慈之願力。懺同分之習因。始從三惑六根。以至十惡五逆。與夫三道輪迴。三界險趣。升沉往復。未獲出離。仰冀三寶聖賢。俯賜證明懺悔。使我等夙障消除。頓空三惑。三觀圓明。三諦頓顯。十身悉備於今生。十界同臻於常樂。隨諸菩薩。斷惑證真。懺悔已。皈命禮諸佛。及地藏菩薩摩訶薩。

南無本師釋迦牟尼佛

南無阿彌陀佛

南無彌勒尊佛

南無過去七佛

南無十方十佛

南無三十五佛

南無五十三佛

南無百七十佛

南無莊嚴劫千佛

南無賢劫千佛

南無星宿劫千佛

南無三世諸佛

南無地藏經中一切諸佛

南無十方諸大菩薩

南無文殊師利菩薩

南無普賢菩薩

南無觀世音菩薩
南無無盡意菩薩
南無無能勝菩薩
南無地藏王菩薩

南無大勢至菩薩
南無虛空藏菩薩
南無無邊身菩薩

禮諸佛已。次復懺悔。上來已懺三障。及與十惡。六根交報。鬼畜人道。種種餘報。乘茲懺力。淨盡消除。惑業果報。永不復為。願令六道四生。各各具足。功德智慧。神通願力。同與菩薩。隨心自在。地藏本願經云。若未來世。比丘。比丘尼。善男子。善女人。童男。童女。諸不自在者。聞我名號。見我形像。燒香散華。供養世尊。禮拜懺悔者。不唯滅除先世罪因苦果。即其現生之中。獲得二十種勝妙善利。一者天龍擁護。疾病不生。二者善果日增。福衍餘慶。三者深植信根。華敷果實。四者衣食豐足。不招貧乏。五者災難消除。身心舒暢。六者離水火災。居處常寧。七者盜賊不侵。烽煙殄滅。八者人見欽敬。遵道行仁。九者酬償夙負。安樂身心。十者先亡得度。奕葉芳馨。十一女轉男身。不生邊鄙。十二報滿生天。志行十善。十三宿命智通。敏修正教。十四所求皆得。遂意圓成。十五眷屬康寧。憂虞屏息。十六諸枉消亡。履止貞吉。十七寤寐神安。身心猛利。十八自他壽命。躋蹶永離。十九菩提不退。道果漸成。二十等行慈善。畢竟成佛。故我今日。率諸淨信。皈依三寶。地藏慈尊。證知我心。遂其成就。如上種種。悉皆應現。又復無始以來

。至於今日。由愛見故。內計我人。外逐惡友。懈怠懶惰。不能精進修行。隨喜善法。事理沉疑。故今發心。隨喜至善。慶己慶人。慶己。則於理無違。慶人。則造事修心。循理。能契始本二覺。造事。能融境智十如。故我今日。發心隨喜。十方一切諸眾生。二乘有學及無學。一切如來與菩薩。所有功德皆隨喜。

又復皈依十方三寶。誓生願生一切菩薩。哀憐攝受。隨喜心已。次當勸請十方三寶。十地聖人。常住在世。是諸聖賢。教化我等。利益群品。故我今日。至心勸請。十方所有世間燈。最初成就菩提者。惟願久住剎塵劫。利樂一切諸眾生。

又復皈依如是三寶。上來懺悔隨喜。勸請已竟。今當發回向心。何以故爾。一切眾生。不能優游解脫者。皆由著於果報。所以不能捨離。凡有一毫之善。能回向菩提。則所修善業。不復繫著。輪迴事絕。經云。修行回向。成大福果。我今所修微善。亦當回向。兼勸一切。莫復貪著。所有懺悔。及與隨喜。勸請因緣。皆悉回向。性相佛法及僧伽。二諦融通三昧印。如是智慧功德海。回向眾生及佛道。

又復皈依三寶聖賢。既發回向心竟。今當發無上菩提願心。經云。有願無行。其願必虛。有行無願。其行亦妄。虛妄行願。何能剋果。故我今日。宜發大願。以願輔行。行助願成。

。行願圓修。契真妙果。以此願行功德因緣。各各具足智慧神通。諸佛行願。從心滿足。又願生生世世。在在處處。以佛慈悲。拔諸眾生。三塗之苦。與諸眾生。二善之樂。究竟菩提。成無上道。又願生生世世。在在處處。令一切眾生。所有無明煩惱。令斷無餘。致顯三諦。又願生生世世。在在處處。咸令一切眾生。從聞思修。一切法門。無不深詣。又願生生世世。在在處處。令諸眾生。信解行證。無上聖道。開示悟入。佛之知見。究竟常樂我淨。顯明心地秘藏。證入其中。又願生生世世。在在處處。應生國土。每值有道國王。儲君宰職。興顯佛法。尊敬大乘。獎導沙門。廣行教化。又願生生世世。在在處處。令我等。內外三術。一念備足。三觀圓明。三諦頓顯。究極心地。竟登秘藏。又願生生世世。在在處處。乘菩薩力。誓生娑婆。及與他方。上弘佛道。下化眾生。究竟圓常。等歸寂滅。上來懺悔已至發願。廣大如法性。究竟等虛空。窮未來際。滿菩提願。同佛菩薩。入秘密藏。

慈悲地藏懺法卷下

離婆離婆帝 求訶求訶帝 陀羅尼帝 尼訶囉帝 毗黎你帝
摩訶伽帝 真陵乾帝 娑婆訶 (七遍)

南無喝囉怛那 哆囉夜耶 佉囉佉囉 俱住俱住 摩囉摩囉
虎囉 吽 賀賀 蘇怛拏 吽 潑抹拏 娑婆訶 (三遍)

唵 鉢囉末鄰陀寧 娑婆訶 (七遍)

讚

地藏懺法 三卷周圓 恩資九有與人天

福利廣無邊 功德攸玄 惟願永流傳

南無地藏王菩薩摩訶薩 (三稱)